

CM Mumbai

मुख्यमंत्री ओमर अब्दुल्ला होरें जंदी संज्ञां मुंबई च बैठकें, प्रोत्साहनें, सम्मेलनें ते प्रदर्शनिएं सरबंधी एम.आई.सी.ई. कार्यक्रम दरान उच्ची सतह दिआं केई सारी बैठकां लाइयां। इस दरान बक्ख-बक्ख खेत्तरें च साथ-सहयोग बधाने पर मुख् करी ध्यान केन्द्रित कीता गेआ जिंदे च खेड्डें, फैशन, कला, आरोग्य, सेहत दिक्खभाल ते तकनीकें आहले खेत्तर शामिल न। इ'नें बैठकें च मुख् बैठक गोल्फ दे खेत्तर दी मन्नी-परमन्नी दी शख्सियत विजय अमृतराज ते उंदी टीम कन्नै लाई गेदी बैठक ही जिस दरान जम्मू-कश्मीर च गोल्फ सरबंधी सैलसफा गी बढ़ावा देने ते खेड्डें सरबंधी ढांचा विकसित करने बारै चर्चा कीती गई। इससै चाल्ली देशै दी मन्नी-परमन्नी दी फैशन डिजाईनर अनिता डोंगरा ते उंदी टीम नै कश्मीर दे पारंपरिक टल्लें ते दस्तकारी उत्पादें गी आलमी सतह दे मंच तोहड़ी पुजाने बारै चर्चा कीती। तोआई मन्ने-परमन्ने दे प्रधान खानसामा विकास खन्ना ते उंदी टीमै कश्मीर दे अनोखे व्यंजनें राहें पाकशास्त्र कन्नै सरबंधत पर्यटन ते सांस्कृतिक आदान-प्रदान गी बढ़ावा देने बारै गल्लबात कीती। एहदे अलावा आरोग्य खेत्तर दे माहिर मिकी मेहरा होरें आरोग्य सरबंधी पर्यटन गी कश्मीर दे खूबसूरत इलाकें कन्नै जोड़ने सरबंधी रणनीति उप्पर लोऽ पाई।

<><><><><><>

JPC Waqf

वक्फ (संशोधन) बिल, 2024 पर संसद दी सांझी समिति अज्ज अपनी रिपोर्ट लोकसभा अध्यक्ष ओम बिरला होरें'गी सौंपग। इस बारै कल नमीं दिल्ली च मीडिया कन्नै गल्ल करदे होई समिति दे अध्यक्ष जगदम्बिका पाल होरें एह जानकारी सांझी कीती। समिति नै कल मसौदा रिपोर्ट गी स्वीकार करी लैता ऐ। जगदम्बिका पाल होरें गलाया जे समिति नै इस बिल कन्नै सरबंधत 14एं प्रावधानें पर संशोधन गी स्वीकार कीता ऐ। उनें गलाया जे पिछले 6एं महीनें दरान इस बिल उप्पर व्यापक विचार बटांदरा होआ ऐ।

<><><><><><>

CJ Judicial Enclave

जम्मू-कश्मीर ते लद्दाख होईकोर्ट दे मुख् न्याऱधीश जस्टिस ताशी राबस्तान होरें कल जिला अदालती परिसर कठुआ च न्यायिक अफसरें लेई पूरी चाल्ली तैयार 5 बधिया किस्मै दे अपार्टमेंटें आहले ज्यूडीशियल एन्क्लेव दा उद्घाटन कीता। इस मौके उप्पर कठुआ जिले दे प्रशासनिक जज जस्टिस रजनीश ओसवाल होर बी उत्थे मजूद हे। मुख् न्याऱधीश होरें अदालती परिसर दे नेडे गै न्यायिक अफसरें लेई बधिया रिहायश दे महत्वे पर लोऽ पाई। उनें कठुआ च जेरे तामीर अदालती परिसर ते जिले च होरनें अदालती इमारतें दा निर्माण तौले मुकम्मल करने दी जरूरतै पर जोर पाया तांजे थाहरै दी कमी गी दूर करदे होई तौले शा तौले अदालतें गी ऐकड़ी इमारतें थमां चालू कीता जाई सकै।

<><><><><><>

CS Drug Abuse

नशे दी कवैतू गी पूरी चाल्ली खत्म करने दी सरकार दी वचनबद्धता गी पक्का करदे होई मुख् सचिव अटल डुल्लु होरें लोकें गी जागरूक बनाइयै समाज थमां इस कवैतू गी खत्म करने गितै इक नतीजाकुन कार्य योजना तैयार करने दी जरूरतै पर जोर पाया। मुख् सचिव होरें इस सबरंधै च सिविल सैक्रेटेरिएट च लाई गेदी इक उच्ची सतह दी बैठक गी संबोधित करै करदे हे। मुख् सचिव होरें सूचना मैहकमे गी निर्देश दित्ता जे ओह नशीले दे माडे नतीजें बारै जागरूकता पैदा करने लेई होरनें मैहकमे दे सैहयोग कन्नै कम्म करन। श्री डुल्लु होरें इस सरबंधै च लोकें गी जागरूक बनाने लेई अभियान चलाने, सोशल मीडिया ते सार्वजनिक ट्रांसपोर्ट सने सार्वजनिक थाहरें उप्पर इश्तेहार लाने दे महत्वे पर बी जोर भरेया। उनें मैहकमे गी निर्देश दित्ता जे ओह नशे दे माडे असर बारै इक लौहकी फिल्म बी तैयार करै।

<><><><><><>

CS JKPCC

मुख् सचिव अटल डुल्लु होरें कल इक बैठक लाइयै जम्मू-कश्मीर प्रदूषण नियंत्रण कमेटी दे कम्मकाज दा जायजा लैता। इस मौके उप्पर कमेटी अग्गे दरपेश चुनौतिएं दी शिनाख्त करने ते अग्गे दी रणनीति तैयार करने बक्खी ध्यान केन्द्रित कीता गेआ। श्री डुल्लु होरें नियमें दी उल्लंघना करने आहले क्रैशरें ते इट्टें दे भट्टें गी बंद करने लेई प्रदूषण नियंत्रण कमेटी आसेआ जारी हुकमें दी जमीनी सतह उप्पर अमल-आवरी जकीनी बनाने दे हुकम बी रसाल कीते।

<><><><><><>

Gandhi Death Anniversary

समूलचा राष्ट्र अज्ज राष्ट्रपति महात्मा गांधी होरें गी उंदी 77मीं बरसी पर चेता करा करदा ऐ। इस मौके उंदी समाधि “राजघाट” पर इक विशेष श्रद्धांजलि समारोह दा सरिस्ता कीता गेआ जित्थें उनें गी श्रद्धांजलि भेंट करदे होई सर्वधर्म प्रार्थना सभा दा बी सरिस्ता कीता गेआ। मुख्य भरै च इस मौके विशेष कार्यक्रम आयोजित करियै उनें गी श्रद्धांजलि भेंट कीती जंदी ऐ। प्रधानमंत्री नरेन्द्र मोदी होरें बी अज्ज महात्मा गांधी होरें गी उंदी बरसी पर श्रद्धांजलि अर्पित कीती। सोशल मीडिया दी इक पोस्ट च श्री मोदी होरें आखेआ जे महात्मा गांधी हुंदे विचार विकसित भारत दे निर्माण च सदा असें गी अगगे बधांदे रौहडन। प्रधानमंत्री होरें देसै लेई सर्वोच्च बलिदान देने आहले होरनें शहीदे गी बी इस मौके उपपर श्रद्धांजलि दित्ती ते उंदिएं सेवाएं गी बी चेत्ता कीता।

<><><><><><>

Badhaal

राजौरी जिले च रहस्यमयी बमारी दी मारै हेठ आए दे बडहाल गां थमां दिल बधाने आलियां खबरां आवै करदियां न ते जंदी 24 जनवरी थमां लेइयै हूनै तोड़ी उत्थुआं इस बमारी दा कोई बी नमां मामला सामने नेई आया ऐ। दूई बक्खी राजौरी दे डिप्टी कमीशनर अभिषेक शर्मा हुंदी दिक्ख-रिक्ख हेठ जिला प्रशासन आस्सेआ बडहाल गांS दे बसनीकें दी दिक्खभाल आस्तै सब्बै लोडचदे हीले बरोबर जारी रक्खे गेदे न। हालात पर काबू पाने ते होर नमें मामले गी रोकने दे मकसद कन्नै 364 लोकें आलें परोआरें गी बहाल गां थमां राजौरी मुंतकिल कीता गेदा ऐ। एह्दे अलावा सांझे जतनें गी असरदार ढंगै नै तोड़ चाढ़ने, लोकें दिएं चैंताएं गी दूर करने ते डर-त्राह आली स्थिति बनने थमां रोकने लेई अतिरिक्त जिला विकास कमीशनर हुंदी निगरानी हेठ इक नियंत्रण कक्ष बी खडेरैआ गेदा ऐ।

<><><><><><>